

Mahathir jadi PM 'drama' Harapan

SINAR HARIAN

10 JANUARI 2018

PEMILIHAN Tun Dr Mahathir Mohamad sebagai perdana menteri oleh Pakatan Harapan (Harapan) membuktikan pembangkang mengakui pemerintahan BN sehingga kini adalah cemerlang di sebalik dakwaan mereka, menurut penganalisis politik.

Pensyarah Kanan Hal Ehwal Politik dan Antarabangsa, Universiti Utara Malaysia (UUM), Md Shukri Shuib berkata, keputusan itu turut membuktikan pihak pembangkang adalah 'raja drama' dan isu-isu ditimbulkan sewaktu Dr Mahathir menjadi perdana menteri hanya direka untuk peroleh undi rakyat.

"Kalau pada era Dr Mahathir, beribu isu mereka boleh timbulkan, dan hari ini dia mereka angkat jadi calon perdana menteri, saya percaya isu-isu mereka timbulkan ke atas (Perdana Menteri) Datuk Seri Najib Tun Razak juga hanya sandiwara, dan akan hilang sekiranya Najib memihak kepada mereka," katanya.

Md Shukri menyifatkan pembangkang sebagai 'neo-Zimbabwe' atau 'neo-Mugabelism' kerana menamakan bekas perdana menteri paling lama memerintah Malaysia itu sebagai perdana menteri sekali lagi di usianya menjangkau 90-an.

"Di Zimbabwe mereka tolak presidennya, Robert Mugabe kerana faktor usia dan kurangnya kepekaannya terhadap perubahan semasa. Kini seolah-olah Malaysia mahu pergi ke arah negara mereka pula. Takkan mereka tak ada calon lebih muda untuk ditampikan sebagai perdana menteri?," soalnya.

Setiausaha Kluster Politik, Keselamatan dan Antarabangsa Majlis Profesor Negara (MPN), Prof Datuk Dr Abdul Halim Sidek berkata, pembangkang

berdepan situasi bahaya apabila memutuskan Dr Mahathir sebagai calon perdana menteri mereka.

“Pakatan sepatutnya sedar tujuan Dr Mahathir bergabung dengan pembangkang... sekarang dia setuju Presiden PKR, Datuk Seri Dr Wan Azizah Wan Ismail sebagai calon timbalan perdana menteri.

“Tapi itu cerita dan janji sekarang... dia belum jadi perdana menteri lagi dia setuju dengan semua syarat. Sebaik sahaja Dr Mahathir berkuasa nanti Pakatan itu sendiri yang mula-mula dihancurkan,” katanya.

Abdul Halim berkata, perjanjian menaikkan Ketua Umum Pakatan Harapan, Datuk Seri Anwar Ibrahim yang sedang jalani hukuman penjara sebagai calon perdana menteri ke-8 juga merupakan bayangan yang samar dan sukar direalisasikan.

“Perlu ingat... sebaik sahaja Dr Mahathir memerintah negara dia boleh lantik sesiapa sahaja yang dia mahu, tiada siapa mampu menghalangnya. Selama 22 tahun dia jadi perdana menteri, dia memang penuh dengan helah licik,” katanya.

Katanya, keadaan Pakatan Harapan ketika ini adalah goyah dan kucar-kacir walaupun mereka kelihatan ‘sepakat’ tetapi hakikatnya mereka hanya terpaksa duduk bersama-sama.

“Kesepakatan mereka tunjukkan ketika ini hanyalah syarat... mereka mesyuarat ini pun bukan bukti mereka bersatu tetapi untuk penuhi syarat RoS, kalau tidak masing-masing dalam pakatan itu tidak boleh bertanding,” katanya.

Sementara itu, jurucakap publisiti MCA, Datuk Seri Ti Lian Ker menyifatkan pengumuman itu sebagai pengkhianatan nyata DAP terhadap anggota dan penyokongnya.

Katanya, DAP mungkin sengaja memilih melupakan prinsip dan janji dibuat kepada rakyat khususnya komuniti Cina akibat ketamakan mereka untuk berkuasa dan menguasai Putrajaya, tetapi mereka tidak sepatutnya melayani penyokong dan mereka yang bersimpati dengannya seperti 'mayat hidup politik'.

Lian Ker berkata, pemimpin DAP sebelum ini mendakwa, Dr Mahathir telah mengkhianati dan memperdayakan masyarakat Cina dengan menyetujui tuntutan SUQIU (Jawatankuasa Rayuan Pilihan Raya Persatuan-Persatuan Cina Malaysia) bagi Keharmonian Nasional sebelum pilihan raya umum 1999 dan selepas beliau menang, beliau berpaling tadah dan mengecap mereka yang mendesak dan menyokong SUQIU sebagai komunis, ekstremis dan tidak tahu berterima kasih.

Senada dengan pandangan Lian Ker, Ketua Pemuda MIC, Datuk Sivaraajh Chandran berpendapat kembalinya Dr Mahathir sebagai perdana menteri pastinya merupakan berita buruk buat kaum India kerana mereka yang paling terjejas oleh dasar-dasar berasaskan kaum yang diamalkan Dr Mahathir semasa menjadi perdana menteri.

Sivaraajh berkata, kaum India perlu ingat bahawa dasar-dasar ditetapkan oleh Dr Mahathir semasa mentadbir negara selama 22 tahun telah secara beransur-ansur menghakis hak kaum India dalam perkongsian ekonomi negara ini.

"Beliau berjanji lakukan lebih baik kali ini, tetapi jika beliau gagal menjamin bantuan dan peruntukan sampai kepada kaum India sedangkan ketika itu parti kaum India sebahagian komponen BN diterajuinya, bagaimana beliau dapat

melakukannya apabila menerajui barisan Harapan yang tidak mempunyai satu parti pun mewakili kepentingan kaum India,” tegasnya. – Bernama

© 2017 All Rights Reserved • Karangkrak Group Media • © 2017 Hakcipta Terpelihara • Kumpulan Media Karangkrak

Source: <http://www.sinarharian.com.my/mobile/politik/mahathir-jadi-pm-drama-harapan-1.781454>